

Regional News Unit AIR Aizawl
Tuesday, March 26, 2024

7:30 -7:40Hrs

REGIONAL NEWS BULLETIN

HEADLINES (MORNING)

- Thla thar April ni 19-a Mizoram Lok Sabha bial inthlan vote thlak turah candidate 6-in an chuh dawn tih a chiang tawh.
- MRB Champhai Branch-a sum puktir dana thil dik lo tak awm ni-a hriat chu CBI kutah hlan a ni.
- Centre for Environment and Social Justice (CESJ) chuan solar plant atana village council (VC)-te hnenah ram an dilna hnûk kîr turin Power & Electricity department an ngen.
- External Affairs Minister Dr. S. Jaishankar-a'n nimirin khan Singapore Prime Minister, Lee Hsien Loong-a a kawm.

<><><>

LS POLLS - CANDIDATES

April ni 19-a Mizoram Lok Sabha bial inthlan vote thlak turah candidate 6-in an chuh dawn tih a chiang tawh a, mi 5 hi political party-in an dintir an ni a, 1 chu independent a ni.

Mizoram Lok Sabha bial chuh tur hian rorel lai ZPM chuan Pu Richard Vanlalhmangaiha chu an party candidate a ni tih an puang tawh a. Kar kalta Zirtawpni khan chuh turin Returning Officer, Aizawl District DEO Pi Nazuk Kumar-i hnenah a nomination a thehlut tawh a. MNF candidate, Rajya Sabha member ni lai Pu K. Vanlalvena pawhin naktukah nomination a thehlut dawn ni-a thu dawn a ni.

Mizoram Pradesh Congress Committee (MPCC) chuan Lok Sabha inthlan chuh turin an party candidate atan MPS officer chawl ta, Mizoram Home Secretary atanga pension Pu Lalbiakzama chu an thlang a, ani hian vawiinah nomination thehluh a tum a. PC Party chuan an party candidate atan Pi Rita Malsawmi hming an puang tawh bawka a, vawiinah nomination thehluh a tum. Ani hi kum 1971-a Mizoram Lok Sabha bial kan neih atanga MP chuhtu hmeichhia 3-na a ni. BJP chuan an state unit president Pu Vanlalhmuaka a din tur thu nimirin khan an puang bawka. Kum 2019-a independent-a Lok Sabha MP chuh tawh mining engineer chawl tawh Pu Lalhriatrenga Chhangte chuan independent bawka tun tum Lok Sabha inthlanpui hi chuh a tum thu leh vawiin hian nomination a thehluh dawn thu a sawi.

Hetih lai hian political party hrang hrang leh MP candidate te hian inthlan campaign an tan tawh a. MPCC chuan Ningani khian Lok Sabha inthlanpui lo awm tur atan campaign beihpui an thlak tan dawn a. Tun tum Lok Sabha Mizoram bial inthlanna atan hian Election Commission chuan March ni 20 khan hriattirna a tichhuak a.

Khami ni atang khan nomination thehluh tan theih a ni a. Chuh tumte hming pek luh theih hun hi Nilaini khian a tawp ang a, a tuk Ningani-ah nomination lekhate endik a ni ang. March ni 30 khi hming pelutte'n an nomination an hnuhdawh theihna ni hnuhnung ber a ni dawn a. April ni 19-ah vote thlak a ni ang.



BANK FRAUD-CBI

Mizoram Rural Bank (MRB) Chairman-in a ngen angin MRB Champhai Branch-a sum puktir dana thil dik lo tak awm ni-a hriat chu Central Bureau of Investigations (CBI) kutah hlan a ni.

Thu dawn danin Champhai MRB Branch atang hian KCC account ami chu mi 1,290-te bank account hmangin kha tih laia branch manager khan kum 2021 chho khan Cheng vaibelchhe 20 leh Nuai 64 chuang a puktir a. Heta pawisa puk hi Savings Bank account pakhat chhun luh a ni tih hriat chhuah a ni a. He savings bank account neitute hi - Lucas Thangmangliana, PS Zatluanga, T. Paulamthanga, Tuangzapauva leh Jacob Thanglianchina te an nih thu MRB hotute chuan an sawi a. Kum 2022 August thla bul lamah khan Champhai Police Station-ah FIR thehluh a ni a. Police lamin charge sheet thehluh tawh mah se Bank danah bank sum chingpen chu CBI chhuitir tur tih a awm avangin MRB Chairman ngenna angin kumin February thla laihawl vel khan Lokayukta chuan CBI kutah he thil chhui hna hi a pe a. CBI lam atang erawh chuan engmah hriat a la ni lo thung.

Heta loan an pek chhuah hi rulh a awm ta lo reng reng nia sawi a ni a. Inbumna thil a nih bakah MRB hian an hloh nasa hle a. Pawisa luh khawmna Savings Bank account neitute zing ami pakhat Lucas Thangmangliana hi mihring sam (hair) hmanga dik lo taka sumdawng zinga telah puh a ni a. Champhaia a in pawh Enforcement Directorate a thawkte'n an dap a, mahse Lucas Thangmangliana hi Myanmar lamah a lo bibo hman ni a thu dawn a ni. Enforcement Directorate hian Hyderabad atanga Mizoram kaltlanga China-a sam hmanga sumdawnaah hian Hyderabad-a company thenkhat bakah St. Mary's Gem Industries, Sun Moon Human Hair Champhai leh Thari Enterprises, Aizawl-te pawh an dap a ni.



CEJS

Centre for Environment and Social Justice (CESJ) chuan solar plant atana village council (VC)-te hnena ram an dilna hnûk kîr turin Power & Electricity department an ngen.

CESJ chuan Mizorama ni zung chakna hmanga kawlpheha siam chhuah a nih dan ngun taka an zir thu tarlangin, Mizoram khaw hrang hranga VC-te hnena an ram chhunga solar plant hmun tur dilna lehkha kumin February ni 19-a an tih chhuah tawh chu a rang lama hnûk kîr turin P&E department an ngen a ni.

Public private partnership (PPP) mode-a solar power siam chhuah a, kawlpheha lei tura inremna ziah belh chu kawlpheha Mizoram intodelhna kalkawng pawimawh ber ni loa an hriat thu an sawi a. CESJ chuan, PPP mode-a power siam chhuahna leh siam tumna hmun hrang hrang - Vankal, Tlungvel, Keifang, North Vanlaiphai, Thenzawlte leh hmalakna tura inremna awm sate chu enfel hmasak an duh a.

Solar power chu chhûn lamah chauh hman theih a nih avangin zan lamah phai atangin kawlphehtha lak reng a ngai tho niin an sawi.

CESJ tarlan danin, PPP mode-a kawlphehtha siam chhuah sorkarin lei lêt leh tura inremna siam chu a man a sang a. Kawlphehtha siam chhuah atangin unit khat Rs. 4 leh pawisa pangain an lei a, chu ai chuan India Power Market (Indian Energy Exchange Limited)-ah a man ngai emaw tláwm zawk emawa leiin environment humhalhna a ni nghal dawn niin a sawi bawk.

<><><>

NE GAMES

North East Olympic Games neih zawh takah Mizoram Olympic Association (MOA) chuan an thlen chin chu lawmawm an ti a, hmasawn ngaihna lai erawh an la nei tih an sawi.

Akashvani Aizawl zawhna chhangin MOA Vice President Pu Lallianthuma chuan nikum aiin hma an sawt hret a, nikumah chuan a pumpuiah parukna an ni tih sawiin an chungah Arunachal Pradesh leh Nagaland te an awm a, kuminah chuan a pumpuiah palina an luah thei, a ti.

Mizoram team hian gold medal 17 an la a, North East Games vawi thum neih tawh china gold medal an lak hnem ber tum a ni. Gold medal bakah hian silver medal 15 leh bronze medal 27, a vaiin medal 59 an la a ni.

Mizoram Chef de Mission Pu Lallianthuama chuan Mizoten an thatna leh medal an lak thatna thin Weghtlifting leh Judo te chu tun tum NE Games-ah hian telh a ni lo tih a sawi a, inelna thlengtu Nagaland lamin anmahni ram mil leh an khelh thiam chi infiamna an telh belh nasa tih a sawi bawk.

North East Olympic Games hi March ni 18 atanga ni 23 chhung khan Nagaland-a district pathum – Kohima, Dimapur leh Chumoukedim-ah te neih a ni a, a pumpuiah Manipur chuan medal 130 lain pakhatna an ni.

Mizoram team hi hlawm hrang hrangin an lo haw a, nimin tlai kha chuan Aizawl an lo thlen kim hman beisei a ni.

<><><>

EXTERNAL AFFAIRS MINISTER

External Affairs Minister Dr. S. Jaishankar-a'n nimin khan Singapore Prime Minister, Lee Hsien Loong-a a kawm.

Ram hruaitu pahnih inkawm hian Indo-Pacific leh West Asia chungchanga an ngaihndan te an inhrilhtawn a. Hemi hnu hian Vantlang Auhmun (Social media)-ah Dr. Jaishankar-a hian India leh Singapore inlaichinna chungchanga Singapore Prime Minister-in a ngaihndan tha tak tak a sawi chhuahte chu ram pahnih inzawmna tichaktu a ni fo tih a tarlang a. Singapore Prime Minister-in khawvel dinhmun a thlir dan te pawh India chuan a ngai pawimawh hle a ni, a ti.

Hemi hma hian External Affairs Minister hian Singapore Foreign Affairs Minister, Vivian Balakrishnan-a a kawm bawk a. India leh Singapore thawhdunna kawnga hmasawn dan te an sawidun a ni.

<><><>